

## 2. gr.

Af hverju formi sérlyfs, sem er á sérlyfjaskrá 1. janúar ár hvert, skal greiða árlegt gjald að upphæð kr. 7.250,00 er greiðist fyrir 1. mars ár hvert.

Ef tvö eða fleiri form sama sérlyfs innihalda mismunandi efni eða mismunandi mikið af sömu efnum, skal greiða árgjald sem um tvö eða fleiri form væri að ræða.

## 3. gr.

Ráðherra getur veitt undanþágu frá greiðslu árgjalds sérlyfs, ef sérstakar aðstæður mæla með. Umsóknir um slíkar undanþágur sendist ráðuneytinu.

## 4. gr.

Gjöld samkvæmt reglugerð þessari skulu standa straum af kostnaði við starfsemi lyfjanefndar og eru lögtakskræf.

## 5. gr.

Reglugerð þessi er sett samkvæmt heimild í 7. gr. lyfjalaga nr. 108 14. nóvember 1984 og öðlast gildi við birtingu.

Jafnframt fellur úr gildi reglugerð með sama heiti nr. 428/1989.

*Heilbrigðis- og tryggingamálaráðuneytið, 3. júní 1991.*

**Sighvatur Björgvinsson.**

*Einar Magnússon.*

**REGLUGERÐ****fyrir Fiskveiðasjóð Íslands.**

## 1. gr.

Hlutverk Fiskveiðasjóðs Íslands er að efla framleiðslu og framleiðni í fiskveiðum, fiskiðnaði og skyldri starfsemi.

Lán vegna nýsmíði, innflutnings og endurbóta á fiskiskipum skulu við það miðuð, að afkastageta fiskiskipastólsins verði í sem bestu samræmi við afrakstursgetu fiskstofnanna.

Lán til endurbóta á fiskiskipum skulu fyrst og fremst stuðla að orkusparnaði, bættri aflameðferð og bættum aðbúnaði skipshafnar.

Lán til fiskvinnslufyrirtækja skulu við það miðuð, að afkastageta í hefðbundnum vinnslugreinum aukist ekki, heldur stuðli að nýjungum, aukinni framleiðni og bættum gæðum afurða.

## 2. gr.

Umsækjandi skal jafnan gera fullnægjandi grein fyrir fjármögnun framkvæmda umfram það sem felst í láni Fiskveiðasjóðs.

Pegar um er að ræða nýsmíði fiskiskips eða kaup á skipi erlendis frá þarf umsækjandi að hafa lagt það sem vantar á að fjármögnun sé tryggð inn á bundinn bankareikning eða leggja fram bankaábyrgð fyrir því áður en umsókn er afgreidd.

## 3. gr.

Skilyrði fyrir lánveitingu til nýsmíða fiskiskipa innanlands eða erlendis svo og til kaupa á fiskiskipum erlendis frá er að skip sem umsækjandi á af sömu eða svipaðri stærð og afkastagetu, verði eða hafi verið strikuð endanlega út af skipaskrá.

Umsókn um nýsmíði eða kaup á tilteknu fiskiskipi ásamt fullnægjandi gögnum verður að hafa borist innan 12 mánaða frá því að sambærileg skip hurfu af skipaskrá.

## 4. gr.

Lán úr Fiskveiðasjóði Íslands skulu skiptast í eftirgreinda lánaflokka:

**A. Skipalán.**

Lán vegna nýsmíði, endurbóta, véla- og tækjakaupa og vegna notaðra skipa sem keypt eru erlendis mega hæst vera 65% af kostnaðarverði. Hámarkslánstími skal vera allt að 18 ár.

**B. Fasteignalán.**

Lán vegna nýbygginga, endurbóta og véla- og tækjakaupa mega hæst vera 75% af kostnaðarverði. Þó skal fasteignalán aldrei nema hærri fjárhæð en 60% af matsverði eignanna miðað við 1. veðrétt og minnka sem nemur áhvílandi lánnum af 1. veðréttum fæst ekki. Hámarkslánstími skal vera allt að 18 ár.

**C. Hagræðingarlán.**

Stjórn sjóðsins getur ákveðið lánveitingu til hagræðingar s.s. fjárhagslegrar endurskipulagningar og sameiningar fyrirtækja.

Lánsfjárhæð og lánstími fer eftir mati stjórnar hverju sinni, en takmarkast þó af veðhæfi þeirra skipa eða fasteigna, sem sett eru að veði fyrir láninu.

## 5. gr.

Stjórn sjóðsins skal setja starfsreglur um lánveitingar samkvæmt A og B liðum 4. greinar. Umsækjendur skulu eiga auðveldan aðgang að þeim starfsreglum, sem gilda hverju sinni.

## 6. gr.

Fiskveiðasjóði Íslands er heimilt að veita lán í reikningseiningum Fiskveiðasjóðs Íslands (R.F.Í.) og breytist reikningseining sjóðsins í samræmi við breytingar á vegnu meðaltali erlendra gjaldmiðla, erlendra reikningseininga og vísitölu, allt eftir samsetningu höfuðstóls langtímaskulda og útlána Fiskveiðasjóðs Íslands.

Þegar Fiskveiðasjóður skráir verðgildi reikningseininga sinna (R.F.Í.) skal liggja fyrir vægi þeirra erlendu gjaldmiðla, erlendra reikningseininga og skulda háðra vísitölu sem til grundvallar er lagt. Vægi hvernar einingar skal þannig fundið að frá þeirri fjárhæð sem Fiskveiðasjóður skuldar í hverri einingu skulu dregin útlán í sömu einingu og jákvæður mismunur verður hluti vogarinnar. Áður en summa erlendra gjaldmiðla og erlendra reikningseininga kemur inn í vogina skal draga útlán með gengisákvæði frá þeirri summu að því marki sem þau eru háð gengi.

Sjálf reikningseiningin (R.F.Í.) breytist daglega í sama hlutfalli til hækkunar eða lækkunar og verðgildi vogarinnar breytist. Vægi eininga í voginni getur Fiskveiðasjóður endurreiknað eins oft og þurfa þykir en eigi skal það gert sjaldnar en ársfjórðungslega.

Skuldbindingar og kröfur sem í upphafi eru til tveggja ára eða lengri tíma teljast í þessu sambandi langtímaskuldir og útlán.

Eigið fé Fiskveiðasjóðs hefur engin bein áhrif á skilgreiningu reikningseiningar Fiskveiðasjóðs Íslands.

Á sömu dögum og Seðlabanki Íslands skráir verðgildi erlendra mynta í krónum talið skal Fiskveiðajóður Íslands skrá verðgildi einnar reikningseiningar Fiskveiðasjóðs Íslands í krónum talið með a.m.k. tveimur aukastöfum.

## 7. gr.

Stjórn Fiskveiðasjóðs getur í hverju tilviki áskilið að lántaki útvegi erlent lán, sem Fiskveiðasjóður yfirtekur og lengir í sumum tilvikum.

Um tilhögun slíkra lánveitinga fer eftir nánari ákvörðun sjóðsstjórnar.

## 8. gr.

Um öll lán úr Fiskveiðasjóði sem ekki eru að fullu greidd en voru veitt og afgreidd samkvæmt ákvæðum eldri reglugerða fyrir sjóðinn skulu gilda þau hin sömu ákvæði þótt þær reglugerðir séu að öðru leyti felldar úr gildi með 9. gr. þessarar reglugerðar.

## 9. gr.

Reglugerð þessi er hér með sett samkvæmt lögum nr. 44, 25. maí 1976 um Fiskveiðasjóð Íslands til þess að öðlast þegar gildi og birtist til eftirbreytni öllum þeim sem hlut eiga að máli. Jafnframt eru eftir því sem við á, sbr. 8. gr., felldar úr gildi reglugerðir nr. 278/1979, fyrir Fiskveiðasjóð Íslands um lánaflokka, svo og reglugerðir um sama efni, nr. 451/1979, nr. 331/1979, nr. 331/1980, nr. 628/1981, nr. 617/1980, nr. 213/1985, nr. 98/1986 og nr. 52/1987.

*Sjávarútvegsráðuneytið, 14. júní 1991.*

**Þorsteinn Pálsson.**

Jón B. Jónasson.

## GJALDSKRÁ

### um sorphirðu í Mýrdalshreppi.

## 1. gr.

Sorphirðugjald í Mýrdalshreppi fyrir árið 1991 skal vera kr. 6 200,00 skv. 9. gr. samþykktar um sorphirðu í Mýrdalshreppi nr. 113/1989.

Gjaldið skal innheimtast með fasteignagjöldum.

## 2. gr.

Ofangreind samþykkt hreppsnefndar Mýrdalshrepps er hér með staðfest skv. lögum nr. 81/1988 um hollustuhætti og heilbrigðiseftirlit og gildir frá 1. janúar 1991.

*Umhverfissráðuneytið, 14. júní 1991.*

F. h. r.

**Páll Líndal.**

Sigurbjörg Sæmundsdóttir.